



CH-7144 Vella, 12/05/2017

Novitads dalla suprastanza communal

Planisaziun locala

Enteifer la fasa da cooperaziun tier la revisiun totala dalla planisaziun locala dalla vischnaunca Lumnezia ei ina retscherca vegnida fatga per aschia intervegnir ils basegns dad indigens e hosps. Ils resultats dalla retscherca vegnan ussa evaluai e silsunter presentai a caschun d'ina occurrenza d'informaziun.

Vendita d'ina parcella da baghegiar a Morissen

La suprastanza communal ha decidiu da vender la parcella nr. 3571 el quartier Bual a Morissen ad in interessent digl exteriur che prenda domicil en vischnaunca e surbaghegia la parcella cun in object da habitar primar.

Dretg da retrer aua a Zeznas, Camuns

La suprastanza communal ha decidiu da conceder a Reto Derungs, Obersaxen Meierhof, il dretg da retrer aua dalla fontauna sin parcella nr. 711 a Camuns en favur dalla parcella nr. 704 cun las medemas cundiziuns sco il dretg ch'era vegnius concedius il 2016 a Franzisca Arpagaus-Solèr.

Affittaziun tegia dil starler Fantanuglias a Morissen

La tegia dil starler Fantanuglias ei vegnida fittada a Remo Riedi per in cuoz da 5 onns. Silsunter vegn l'affittaziun dalla tegia puspei publicada.

Project Palius

L'emprema badelada dalla surbaghegiada Palius ei succedida ils 6 da mars 2017. Las medias ein stadas presentas stediamein. Da present tscherca la vischnaunca interessents che vulan prender a tscheins ni cumprar las duas habitaziuns che vegnan construidas en connex cul project.

Reparatura da rempars d'ual ella Val Buera a Cumbel

Enteifer il project collectiv ovras da protecziun 2017/18 succeda la reparatura da duas siaras dils rempars d'ual ella Val Buera a Cumbel. Las siaras cun lenna rodonda duein vegnir remplazzadas cun mirs da crappa.

Via Gudigliel a Cumbel

La via da meglieraziun Gudigliel a Cumbel vegn sanada proximamein. Las lavurs ein previdas denter miez zercladur e miez fenadur.

Remplazzar hidrometers a Vella e Degen

Ils 13 da fenadur 2015 ha la suprastanza communal decidiu d'installar dumbraders d'aua cun indrez da func. Igl onn 2015 ei quei succediu els loghens nua che dumbraders muncavan. Igl onn 2016 ein las adattaziuns necessarias vegnidas fatgas els vischinadis da Suraua e Vignogn. Per igl onn 2017 succeda la davosa etappa cun adattar ils dumbraders a Vella e Degen. Las lavurs d'installaziun vegnan exequidas el decuors digl onn entras il menaschi tecnic.

Seiv sil plaz scola a Lumbrein

La seiv sin la parcella nr. 5026 per liung dalla via cantunala a Lumbrein ei demolida. La suprastanza communal ha decidiu d'allontanar la seiv cun las plontas che disturban e da construir ina seiv nova agl ur dil plaz da giugs per affons pigns.

Taxas per patentas da cristallas e mineralias

Ils 12 da fevrer 2017 ei la lescha davart igl encurir e cavar cristallas e mineralias per la vischnaunca Lumnezia vegnida approvada entras la cuminonza dils votants all'urna. Tenor art. 20 dalla lescha ha la suprastanza communal da fixar las taxas. Ella ha fatg quei cun fixar mintgamai las taxas minimalas enteifer la rama pusseivla.

Gruppa da giugs per affons pigns a Cumbel

Dapi entgins onns exista ina cunvegna da prestaziun denter la vischnaunca Lumnezia e l'Uniun gruppa da giug per affons pigns Glion per menar a Cumbel la gruppa da giug per la vischnaunca Lumnezia. La suprastanza communal ha decidiu da prolunghir la cunvegna per igl onn 2017/18.

Eleccziun da personal

La suprastanza communal ha elegiu il suandont personal

- Luvrers communal: Lucas Cajochen-Janka, Rumein / Casper Josef Derungs, Camuns
- Menadra partiziun finanzas e personal: Selina Caduff, Laax
- Persuna da schubergiar casa da scola Uors: Ignaz Anton Albin, Uors

Localitads da biro per lavur da giuventetgna

Igl anteriur biro da traffic el Casti de Mont a Vella vegn mess a disposiziun alla menadra dalla lavur da giuventegna Lumnezia/Glion, dunna Ibolya Mauch, sco localitad da biro.

Giugs paralimpics mundials da ski alpin 2019

La vischnaunca Obersaxen Mundaun organisescha ils giugs paralimpics mundials da ski alpin che han liug il mars 2019. Ins spetga 140 atlets ord 30 tiaras. Per la planisaziun ed organisaziun dall'occurrentza vegn fundau in'uniun cul num "World Para Alpine Skiing Championships Obersaxen 2019". La vischnaunca Lumnezia daventa medemamein commembra dall'uniun. Tier il commembradi settracta ei d'in act simbolic per in engaschi vicendeivel denter las vischnauncas da Glion, Sursaissa e Lumnezia. Il commembradi cuoza 3 onns.

Project "Wurzel Werk"

La suprastanza communal ha decidiu da metter a disposiziun il plaz necessari sin parcella nr. 2271 Fieus a Cumbel per realisar il project "Wurzel Werk". Il project vul mussar ad interessents co la veta ella natira funcziunescha senza influenza dalla civilisaziun. Igl ei previu d'endrizzar in liug per tipis e suostas ed ina fueina aviarta. La purschida ei planisada per ils meins da fenadur ed uost ed eventualmein igl october.

Bus turistic e bus alpin

La proxima stad san indigens e hosps nezegiar gratuitamein il bus turistic che cursescha denter Vella e Triel. Il bus alpin cursescha denter ils 24 da zercladur ed igl 1. d'october denter Vrin e Puzzatsch. Per migliurar la colligaziun cul traffic public ei in cuors da marvegl supplementar vegnius introducuis. Quel parta naven da Cumbel allas 7.15 e contonscha Puzzatsch allas 7.50. Dapli informaziuns ein d'anflar sut www.lumnezia.ch → Turissem.

Contract da sponsoring cun Vital Albin

La vischnaunca Lumnezia ha fatg in contract da sponsoring cun Vital Albin. Dad ina vart vul ins nezegiar la caschun per far reclama per la Lumnezia e da l'autra vart duei il sportist lumnezian vegnir promovius. Il contract preveda che Vital Albin porta duront ils proxims dus onns il logo dalla Lumnezia sin sia capellina ni capetscha per aschia far reclama per la Lumnezia. El s'oblighescha plinavon dad esser presents 5 gadas ad onn tier occurrenzas dalla vischnaunca. Vinavon ha la vischnaunca il dretg da duvrar films ni maletgs digl atlet per far reclama en agen interess.

Sustegns finanzials

La suprastanza communal ha decidiu da sustener ils suandonts projects:

- Cudisch da Simon Derungs "Da temps vargai – la historia da Surcasti/Suraua"
- Cudisch da fotografias da Verner Solèr "Bilder eines Emigranten"
- Cudisch digl institut perscrutaziun dalla cultura grischuna "Anatomie einer Revolte"
- Exposiziun tratga da biestga lumneziana
- Bike Marathon Lumnezia 2017
- Exposiziun da fotografias veglias a Vignogn

Canzlia communal

La canzlia communal porscha da niev il survetsch da pagar al spurtegl cun carta EC ni cun carta da credit. Transacziuns entochen CHF 200 succedan senza spesas.